

ljivih tečnosti i/ili gasova suprotno propisanim uslovima (član 17. stav 2.),

9. ako prodaje zapaljive (lako zapaljive) tečnosti i/ili gasove u posudama van prodavaonica zapaljivih tečnosti i/ili gasova (član 18. stav 1.).

Zapaljive tečnosti i gasovi kao predmet prekršaja iz stava 1. ovog člana će se oduzeti.

## X - PRELAZNE I ZAVRŠNE ODREDBE

### Član 25.

Propise za čije je donošenje po ovom Zakonu ovlašten ministar će donijeti u roku od šest mjeseci od dana stupanja na snagu ovog Zakona.

### Član 26.

Danom stupanja na snagu ovog Zakona na području Kantona prestaje važiti Zakon o prometu eksplozivnih materija, zapaljivih tečnosti i gasova ("Sl.list SR BiH", br.39/89 i 36/90).

Propisi donijeti radi provođenja Zakona iz stava 1. ovog člana ostaju na snazi do donošenja propisa za provođenje ovog Zakona ako nisu u suprotnosti sa njegovim odredbama.

### Član 27.

Ovaj Zakon stupa na snagu osmog dana od dana objavlivanja u "Službenim novinama Hercegovačko-neretvanskog kantona".

Bosna i Hercegovina  
Federacija Bosne i Hercegovine  
HERCEGOVAČKO-NERETVANSKI KANTON  
S K U P Š T I N A

Broj: 02-01-XIII-061/05

Mostar, 15. februar 2005. godine

Predsjedavajući  
Omer Čevra, s.r.

38

## Z A K O N

### O SPRJEČAVANJU NEREDA NA SPORTSKIM TAKMIČENJIMA U HERCEGOVAČKO-NERETVANSKOM KANTONU

#### I - OPĆE ODREDBE

##### Član 1.

Zakonom o sprječavanju nereda na sportskim takmičenjima (u daljem tekstu: Zakon) uređuje se

bezbjednost održavanja sportskih takmičenja na području Hercegovačko-neretvanskog kantona (u daljem tekstu: Kanton), bezbjednosti gledalaca, takmičara i drugih učesnika sportskog takmičenja ili sportske priredbe i stvaranje okruženja koje sprječava, suzbija i sankcioniše nedolično ponašanje, nered, te nasilje, prije, za vrijeme i nakon sportskog takmičenja ili sportske priredbe, zaštita gledalaca koji se dolično ponašaju, zaštite drugih građana i njihove imovine i imovine pravnih lica.

##### Član 2.

Pojedini izrazi upotrebljeni u ovom Zakonu imaju slijedeća značenja:

- Sportskim takmičenjem u smislu ovog Zakona smatra se svako pojedino takmičenje u okviru sistema sportskih takmičenja uspostavljenog na osnovu posebnih propisa u kome se takmiče domaći i gostujući sportski klub.
- Sportskim klubom u smislu ovog zakona smatra se svako udruženje, ustanova ili pravno lice koje učestvuje u sportskom takmičenju.
- Organizatori sportskog takmičenja u smislu ovog zakona su sportski klubovi, sportski savezi, sportska udruženja i druga pravna ili fizička lica koja organizuju sportsko takmičenje.
- Sportskim objektom u smislu ovog zakona smatra se pored sportskog objekta prema odredbama posebnog zakona i drugi zatvoreni ili otvoreni objekat koji služi obavljanju drugih djelatnosti kada se povremeno koristi za sportsko takmičenje.
- Alkoholnim pićem u smislu ovog zakona smatra se svako piće koje sadrži alkohol.

##### Član 3.

Ovim zakonom se propisuju:

- protivpravna ponašanja prije, za vrijeme i nakon sportskog takmičenja ili sportske priredbe (u daljem tekstu: sportsko takmičenje),
  - obaveze i odgovornosti sportskih organizacija i ustanova (u daljem tekstu: sportski klub) koji su organizatori ili učestvuju u sportskom takmičenju, te sportskih saveza i drugih sportskih udruženja,
  - posebni uslovi koje mora ispunjavati sportski objekat i obaveze vlasnika ili korisnika sportskog objekta,
  - obaveze i odgovornosti gledalaca sportskog takmičenja, naročito ograničavanja u mogućnosti prisustvovanja sportskom takmičenju,
  - obaveze i odgovornosti sportaša, trenera, sudija i drugih lica koja vode sportsko takmičenje,
  - obaveze i odgovornosti sredstava javnog informisanja,
  - prekršaji i sankcije za protivpravna ponašanja propisana ovim Zakonom.

## Član 4.

Protivpravnim ponašanjem u smislu ovog Zakona smatra se:

- posjedovanje ili konzumiranje alkoholnih pića ili opojnih droga te posjedovanje pirotehničkih sredstava, oružja i drugih sredstava pogodnih za nanošenje ozljeda i za stvaranje nereda i nasilja u sredstvima javnog prevoza tokom čitavog razdoblja od početka odlaska na sportsko takmičenje pa do dolaska na prostoru sportskog objekta i povratka na početno odredište,
- unošenje u sportski objekat alkoholnih pića, opojnih droga, pirotehničkih sredstava, oružja i drugih sredstava pogodnih za nanošenje ozljeda ili za stvaranje nereda i nasilja,
- unošenje i isticanje transparenata, ili drugih stvari s tekstom, slikom, znakom ili drugim obilježjem koje potiče mržnju ili nasilje.
- bacanje predmeta u takmičarski prostor ili prostor gledalaca,
- pjevanje pjesama ili dobacivanje poruka čiji sadržaj iskazuje ili potiče mržnju ili nasilje,
- paljenje i bacanje pirotehničkih sredstava,
- paljenje navijačkih rekvizita i drugih predmeta,
- pozivanje i poticanje na tučnjavu ili na napad na druge gledaoce, redare, službena lica organizatora takmičenja, sportiste i druge učesnike u sportskom takmičenju,
- sudjelovanje u tučnjavi ili napadima na druge gledaoce, redare, službena lica organizatora takmičenja, sportiste i druge učesnike u sportskom takmičenju,
- nedozvoljen ulazak u takmičarski prostor,
- oštećenje ili uništavanje dijelova sportskog objekta, te prevoznih sredstava i druge imovine prilikom dolaska, za vrijeme održavanja ili nakon sportskog takmičenja.

## II - SPORTSKO TAKMIČENJE

### Član 5.

Organizator sportskog takmičenja dužan je procijeniti mogućnosti izbijanja nereda i nasilja na sportskom takmičenju i preduzeti razložne i opravdane mjere radi njihovog sprječavanja i suzbijanja, propisane ovim Zakonom i drugim zakonima i propisima za njihovo provođenje, te propisima međunarodnih i domaćih sportskih saveza.

Organizator sportskog takmičenja u procjeni opasnosti od nereda i nasilja i ocjeni potrebnih mjera za njihovo sprječavanje i otklanjanje dužan je saradivati s nadležnim policijskim upravama odnosno stanicama i osigurati dovoljan broj lica, uključujući i policijske službenike, na prostoru sportskog objekta i u njegovoj neposrednoj blizini, radi provođenja mjera bezbjednosti sportskog takmičenja.

### Član 6.

Organizator sportskog takmičenja, zavisno od vrste sporta i nivoa sportskog takmičenja, vrsti sportskog objekta, očekivanom broju gledaoca, te ocjeni opasnosti za izbijanje nereda i nasilja, mora na sportskom takmičenju imati redarsku službu s dovoljnim brojem redara.

### Član 7.

Redarsku službu mogu činiti zaposlenici organizatora sportskog takmičenja na poslovima redara, redari dobrovoljci iz reda ostalih zaposlenika organizatora sportskog takmičenja ili članova klubova navijača ili drugi navijači organizatora sportskog takmičenja.

Organizator sportskog takmičenja može za poslove redarske službe koristiti i zaposlenike pravnog lica koji obavljaju djelatnost privatne zaštite na osnovu ugovora s tim društvom a u skladu sa posebnim Zakonom.

### Član 8.

Redarska služba mora biti organizovana sa zapovjednom strukturom koja osigurava da svaki redar zna koje mu je lice nadređeno.

Ako sportsko takmičenje osiguravaju i pripadnici policije, najviše rangirano lice u hijerarhiji zapovijedanja biti će iz reda policije.

Policijskim službenicima koji obavljaju poslove unutar sportskog objekta u civilnoj službi organizator sportskog takmičenja dužan je osigurati dovoljan broj ulaznica.

Organizator sportskog takmičenja, zavisno od vrste sportskog objekta, mora osigurati prostoriju ili prostor čiji smještaj i oprema omogućuju vizuelno praćenje sportskog objekta ili njegovog dijela u kojem se odvija sportsko takmičenje i efikasno zapovjedanje redarstvenom službom.

### Član 9.

Redari moraju na odjeći imati vidljivo istaknutu oznaku ili natpis koji označava da su pripadnici redarske službe, pri čemu redari koji su zaposlenici pravnih lica koja obavljaju djelatnost privatne zaštite moraju nositi uniformu i iskaznicu.

### Član 10.

Redari su ovlašteni:

- utvrditi lične podatke lica koja ulaze ili izlaze iz sportskog objekta, pregledati da li lice koje ulazi ili se nalazi u sportskom objektu unosi ili ima alkoholna pića, drogu, pirotehnička sredstva, oružje, ili druge predmete pogodne za nanošenje ozljeda ili za stvaranje nereda i nasilja i oduzeti takve stvari,

- pregledati da li lice koje ulazi ili se nalazi u sportskom objektu unosi ili ima transparente, simbole i sl. koji mogu izazvati nesnošljivost,
- zabraniti pristup u sportski objekat licu za koju se ocjenjuje da je pod uticajem alkohola ili droge, ili koje pokušava unijeti u sportski objekat alkohol, pirotehnička sredstva, oružje, ili druge predmete pogodne za nanošenje ozljeda ili za stvaranje nereda i nasilja, ili koja je poznati izazivač nereda,
- zabraniti gledaocima prelaz iz jednog dijela sportskog objekta u njegov drugi dio,
- zadržati gledaoca koji se nasilno ponaša ili drugačije remeti red i mir na sportskom takmičenju i predati ga policiji,
- udaljiti iz sportskog objekta gledaoca koji je pod uticajem alkoholnog pića ili droge, koji se nasilno ponaša ili drugačije remeti red i mir na sportskom takmičenju,
- onemogućiti gledaoce u pristupu onim dijelovima sportskog objekta koji nije namijenjen gledaocima,
- zabraniti i spriječiti ulazak u sportski objekat,
- spriječiti gledaoca u pokušaju ili činu i svakoga drugoga protivpravnog ponašanja.

Redari u obavljanju svojih poslova smiju upotrijebiti fizičku snagu ako na drugi način ne mogu odbiti:

- napad usmjeren prema sebi, prema gledaocima, prema takmičarima i drugim licima,
- napad usmjeren na uništenje ili oštećenje dijelova sportskog objekta i njegove opreme.

Redari zaposlenici pravnih lica koji obavljaju zaštitarsku djelatnost i pripadnici policije imaju i ovlaštenja propisana posebnim zakonima.

#### Član 11.

Organizator sportskog takmičenja kao redare može zapošljavati ili koristiti samo lica koja su fizički i psihički stručna za obavljanje poslova redara, koji imaju najmanje srednju stručnu spremu, koja nisu osuđivana za prekršajna djela protiv javnog reda i mira ili za krivična djela počinjena iz koristoljublja ili počinjena iz nečasnih pobuda ili za koja se progoni po službenoj dužnosti.

Posebnim Pravilnikom bliže će se propisati organizacija redarstvene službe iz stava 1. ovog člana.

#### Član 12.

Redari moraju u ophođenju s gledaocima biti pristojni i spremni na pomoć, ne smiju biti pod uticajem alkohola ili opojnih sredstava niti smiju iskazivati svoju navijačku pripadnost.

#### Član 13.

Organizator sportskog takmičenja može ugovoriti s gostujućim klubom da poslove redarske službe

među gledaocima navijačima gostujućeg kluba obavljaju i redari gostujućeg kluba.

#### Član 14.

Organizator sportskog takmičenja će pozvati klubove navijača domaćega sportskog kluba, a gostujući sportski klub klubove svojih navijača, da zajedno razmotre mjere koje mogu preduzeti klubovi navijača radi sprječavanja nereda i nasilja prilikom sportskog takmičenja.

#### Član 15.

Sportski klubovi će podupirati osnivanje i rad klubova navijača, omogućiti članovima klubova navijača kupnju ili dodjelu ulaznica za sportsko takmičenje, organizovati za članove klubova navijača posjete sportskim objektima i upoznavanje s takmičarima i službenim licima sportskog kluba, pružati im pomoć prilikom putovanja u zemlji ili inostranstvu na sportska takmičenja u kojima sudjeluje sportski klub, koristiti kao redare i članove klubova navijača.

### III - SPORTSKI OBJEKAT

#### Član 16.

Sportski objekat, pored uslova propisanih posebnim propisima, mora imati dovoljan broj ulaza, odnosno izlaza, mogućnost postavljanja odgovarajućih ograda ili drugih prepreka radi odvajanja pojedinih skupina gledaoca, uspostavljene sisteme informisanja, zaštitu od požara, prostor za pružanje hitne medicinske pomoći, dovoljan broj sanitarnih čvorova lociranih na pojedinim dijelovima sportskog objekta.

Organizator takmičenja dužan je za vrijeme održavanja takmičenja osigurati hitnu i vatrogasnu službu. Ako sportski objekat ima parkiralište, prostor za parkiranje autobusa mora biti odvojen od prostora za parkiranje ličnih automobila, a posebno mora biti osiguran odvojeni prostor za parkiranje autobusa i ličnih vozila navijača gostujućeg sportskog kluba. Ako sportski objekat nema parkiralište ili je njegovo parkiralište nedovoljno za prihvatanje očekivanog broja autobusa i ličnih automobila, o tome će organizator obavijestiti nadležni organ jedinice lokalne samouprave na čijem području se nalazi sportski objekat koji je dužan osigurati pogodan prostor za parkiranje autobusa.

#### Član 17.

Ulaznim i izlaznim vratima sportskog objekta mora rukovati osposobljeno osoblje.

Ulazna i izlazna vrata u sportski objekat i sva vrata prema prostorima gledališta moraju biti otključana za vrijeme dok su gledaoci u sportskom objektu.

Izuzetno nadležni policijski zapovjednik može naložiti da vrata prema prostorima gledališta budu zaključana.

Sva vrata moraju imati sprave za zatvaranje, odnosno otvaranje kojima se može brzo i jednostavno rukovati i ne smiju biti zaključana ključem za vrijeme odvijanja sportskog takmičenja.

Ulazna i izlazna vrata, posebno vrata koja se koriste u vanrednim situacijama (rušenje tribina, krova ili drugog čime je natkriven prostor gledalaca, požar, nekontrolisano kretanje mase gledaoca, nestanak svjetla i sl.) prostor za prodaju ulaznica, rampe za usmjeravanje gledaoca, prolazi (tuneli) i stepenice moraju biti odgovarajuće i vidljivo označeni, te se nalaziti pod stalnim nadzorom redara ili policije za vrijeme sportskog takmičenja.

U vanrednim situacijama mora biti osigurana mogućnost puštanja gledaoca na takmičarski prostor.

#### Član 18.

Sportski objekat mora imati Plan evakuacije kojim su određena postupanja u slučaju vanrednih situacija (rušenje tribina, krova ili drugog čime je natkriven takmičarski prostor, požar, nekontrolisano kretanje mase gledaoca, nestanak svjetla i sl.).

Plan evakuacije donosi vlasnik ili korisnik sportskog objekta nakon konsultacije s policijom, vatrogasnom službom, službom hitne pomoći. Prije početka sportskog takmičenja s Planom evakuacije organizator sportskog takmičenja dužan je upoznati predstavnike sportskih klubova, sudije i druga službena lica na sportskom takmičenju.

#### Član 19.

Sportski objekat, odnosno onaj njegov dio na kome će se održavati sportsko takmičenje i biti smješteni gledaoci mora prije ulaska gledaoca biti pretražen radi pronalazjenja predmeta koji se ne smiju unositi u sportski objekat. Redari, medicinsko i protivpožarno osoblje moraju biti na svojim određenim mjestima prije ulaska gledaoca u sportski objekat sve do njihovog izlaska iz sportskog objekta.

#### Član 20.

Sistem informisanja gledalaca mora biti jasan i jači od buke koju mogu stvoriti gledaoci unutar i izvan sportskog objekta.

Kada u sportskom takmičenju sudjeluje inostrani sportski klub, organizator sportskog takmičenja dužan je osigurati da se poruke i uputstva navijačima inostranoga sportskog kluba upućuju na njihovom jeziku.

Organizator međunarodnoga sportskog takmičenja dužan je omogućiti predstavniku svakog

inostranoga sportskog kluba obraćanje navijačima toga kluba.

Organizator je dužan snimiti sva obraćanja navijačima putem sistema informisanja gledalaca.

#### Član 21.

Unutar sportskog objekta nije dozvoljena prodaja i distribucija alkoholnih pića u smislu ovog Zakona.

Bezalkoholna pića se smiju prodavati ili distribuirati samo ako su u papirnatim ili otvorenim plastičnim posudama.

#### Član 22.

Zatvoreni sportski objekti, i otvoreni sportski objekti ako se na njima održavaju sportska takmičenja noću, moraju biti opremljeni samostalnim izvorom električne energije dovoljnim da se u slučaju nestanka električne energije iz javnog sistema osigura stepen rasvjete dovoljan da se spriječi opasnost za gledaoce.

#### Član 23.

Sportski objekat se, polazeći od vrste i značaja sportskog takmičenja, očekivanog broja gledalaca očekivanog dolaska gledalaca, mora otvoriti dovoljno rano da bi se izbjegle gužve i neredi prilikom ulaska gledalaca u sportski objekat.

### IV - GLEDAOCI

#### Član 24.

Gledalac se, za vrijeme dolaska na sportsko takmičenje, tokom sportskog takmičenja i nakon odlaska sa sportskog takmičenja, ne smije protivpravno ponašati. Gledaocu koji se protivpravno ponaša zabranit će se i spriječiti dolazak na sportsko takmičenje, udaljiti će se iz sportskog objekta i iz okoline sportskog objekta ili mjesta održavanja sportskog takmičenja i mogu mu se izreći ovim Zakonom i posebnim zakonima propisane prekršajne i kaznene sankcije.

#### Član 25.

Policija je ovlaštena licu koje se izjasni kao navijač ili nosi navijačke oznake ili za koje pretpostavlja da ide na sportsko takmičenje, koje svojim ponašanjem izaziva osnovanu sumnju da je pod uticajem alkohola ili opojnih droga ili se drugačije protivpravno ponaša utvrditi identitet, pretražiti ga nosi li alkoholno piće ili opojne droge, pirotehnička sredstva, oružje i druga sredstva pogodna za nanošenje ozljeda ili za stvaranje nereda i nasilja, nosi transparente, simbole i sl. koji sadrže poruke koje mogu izazvati nesnošljivost, oduzeti mu takve stvari, udaljiti ga iz sredstava javnog saobraćaja, zabraniti mu dolazak u mjesto sportskog takmičenja ili ulazak u sportski objekat, zadržati ga do isteka vremena od tri sata

nakon završetka sportskog takmičenja, te preduzeti druge mjere propisane posebnim Zakonom. Policija je ovlaštena u provođenju odredbe stava 1. ovog člana pregledati autobus, voz ili lični automobil koji prevozi navijače na sportsko takmičenje i sa sportskog takmičenja. Ako je lice iz stava 1. ovog člana vozač ili suvozač u ličnom automobilu policija može isključiti iz saobraćaja lični automobil do isteka vremena od tri sata nakon završetka sportskog takmičenja i prema takvim licima preduzeti druge mjere iz stava 1. ovog člana.

**Član 26.**

Policijski službenici mogu gledaoce koji se protivpravno ponašaju zadržati u sportskom objektu ili u okolini sportskog objekta do tri sata nakon završetka sportskog takmičenja i prema njima preduzeti i druge mjere propisane ovim Zakonom i posebnim zakonima. Prilikom preduzimanja mjera iz stava 1. ovog člana vodit će se računa da se ne ugrozi bezbjednost drugih gledalaca, takmičara i da se ne onemogući odvijanje sportskog takmičenja.

**Član 27.**

Policija će lica iz člana 25. stav 1. i člana 26. stav 1. ovog Zakona privesti i zadržati u prostorima policije ili drugim pogodnim prostorima.

Prostori u kojima se zadržavaju lica iz stava 1. ovog člana moraju biti pod neprekidnim nadzorom policijskih službenika.

**Član 28.**

Ukoliko policija ocijeni da uslijed protivpravnog ponašanja gledalaca u sportskom objektu ili u mjestu održavanja prijeti opasnost za bezbjednost gledalaca i takmičara, javni red i mir može zabraniti održavanje sportskog takmičenja. Ukoliko policija ocijeni da uslijed protivpravnog ponašanja gledalaca za vrijeme održavanja sportskog takmičenja prijeti opasnost za bezbjednost gledalaca i takmičara može zatražiti od službenih lica koja vode sportsko takmičenje da privremeno ili trajno prekinu sportsko takmičenje.

**V - SPORTAŠI I DRUGA LICA KOJA UČESTVUJU U SPORTSKOM TAKMIČENJU****Član 29.**

Sportisti, treneri i članovi upravljačkih organa sportskih klubova dužni su u svojim javnim nastupima popularizirati sportske ideje koje isključuju nesnošljiv pristup sportašima i navijačima suparničkih sportskih klubova.

Sportski klubovi, sportski savezi i druga sportska udruženja svojim će aktima utvrditi sankcije koje će

se preduzimati prema sportašima, trenerima i članovima upravljačkih organa sportskih klubova ako su njihovi javni nastupi ili ponašanje prije, za vrijeme ili nakon održavanja sportskog takmičenja mogli izazvati ili su izazvali protivpravno ponašanje gledalaca. Aktima iz stava 2. ovog člana odredit će se disciplinske mjere za sportiste, trenere i članove upravljačkih organa sportskih klubova koji su se za vrijeme sportskog takmičenja protivpravno ponašali, bez obzira je li prema ovim licima pokrenut postupak za izricanje prekršajnih i krivičnih sankcija.

**VI - SREDSTVA JAVNOG INFORMISANJA****Član 30.**

Sredstva javnog informisanja su držaće se od iznošenja ili objavljivati stavove uredništva ili svojih novinara, koji izražavaju nesnošljiv pristup prema nekom sportskom klubu, njegovim sportistima i njegovim navijačima, u skladu sa etikom javnog informisanja. Sredstva javnog informisanja neće iznositi ili objavljivati stavove drugih lica, koji izražavaju nesnošljiv pristup prema nekom sportskom klubu, njegovim sportistima i njegovim navijačima, osim ako istovremeno na nedvojben način osuđuju društvenu i zakonsku neprihvatljivost takvih stavova.

**VII - KAZNENE ODREDBE****Član 31.**

Sankcije za prekršaje propisane ovim Zakonom su novčana kazna, kazna zatvora i zaštitne mjere, a za maloljetne prekršioce i vaspitne mjere.

Prekršajni postupak za prekršaje propisane ovim Zakonom pokreće policijska stanica odnosno uprava nadležna za mjesto održavanja sportskog takmičenja.

Prekršajni postupak iz prethodnog stava može pokrenuti i organizator sportskog takmičenja.

**Član 32.**

Sud za prekršaje može počiniocu prekršaja propisanog ovim Zakonom uz novčanu kaznu i kaznu zatvora, pored zaštitnih mjera propisanih Zakonom o prekršajima, izreći i zaštitnu mjeru zabrane prisustvovanja sportskim takmičenjima u trajanju do jedne godine.

Za prekršaje propisane ovim Zakonom zaštitna mjera oduzimanja predmeta obavezno se izriče.

**Član 33.**

Ako je sportsko takmičenje, na osnovu mjerila iz člana 6. ovog Zakona, ocijenjeno s visokom opasnošću od izbijanja nereda i nasilja, organizator mora na

tom sportskom takmičenju osigurati prisustvo sudije suda za prekršaje

Dežurnog sudiju na zahtjev organizatora određuje predsjednik suda za prekršaje u mjestu održavanja sportskog takmičenja iz stava 1. ovog člana.

#### Član 34.

Počiniocu krivičnog djela učinjenog za vrijeme održavanja sportskog takmičenja sud može pored kazne i bezbjedonosnih mjera propisanih posebnim zakonom izreći i bezbjedonosnu mjeru zabrane prisustvovanja sportskim takmičenjima u trajanju do jedne godine, računajući od pravosnažnosti sudske odluke.

#### Član 35.

Licu za koje postoje dokazi da se već ranije protivpravno ponašalo za vrijeme dolaska, održavanja ili odlaska s nekoga sportskog takmičenja Sud za prekršaje na prijedlog policijske stanice nadležne za mjesto održavanja sportskog takmičenja ili policijske uprave nadležne za područje na kojem se nalazi prebivalište odnosno boravište takvog lica može izreći zabranu prisustvovanja određenom sportskom takmičenju ili zabranu prisustvovanja sportskim takmičenjima za vrijeme koje ne može biti kraće od šest mjeseci niti duže od godinu dana.

#### Član 36.

Policija će o maloljetnim licima za koje je ocijenila ili utvrdila da su protivpravno postupali u smislu ovog Zakona obavijestiti njihove roditelje, odnosno staraoca, nadležni centar za socijalnu zaštitu i obrazovnu ustanovu, a o studentima visokoškolsku ustanovu u kojoj se školuju.

#### Član 37.

Novčanom kaznom od 1000 do 5000 KM kaznit će se za prekršaj organizator sportskog takmičenja, koji:

1. na sportskom takmičenju nema redarsku službu (član 6.),
2. poslove redara obavljaju lica koja nemaju oznaku ili natpis koji označava da su pripadnici redarske službe (član 9.),
3. kao redara zapošljava ili koristi lice koje ne smije biti redar (član 11.).

Za prekršaj iz stava 1. ovog člana novčanom kaznom od 500 do 1000 KM kaznit će se odgovorno lice organizatora sportskog takmičenja.

#### Član 38.

Novčanom kaznom od 1.000 do 4000 KM kaznit će se za prekršaj organizator sportskog takmičenja, vlasnik ili korisnik sportskog objekta:

1. ako na parkiralištu sportskog objekta ne odvoji poseban prostor za parkiranje autobusa (član 16. stav 3.),
2. ako ulaznim i izlaznim vratima sportskog objekta ne rukuje osposobljeno osoblje (član 17. stav 1.),
3. ako ulazna i izlazna vrata sportskog objekta, prostor za prodaju ulaznica, rampe za usmjeravanje gledaoca, prolazi (tuneli) i stepenice nisu odgovarajuće vidljivo označeni (član 17. stav 5.),
4. ako se ulazna i izlazna vrata sportskog objekta, prostor za prodaju ulaznica, rampe za usmjeravanje gledalaca, prolazi (tuneli) i stepenice ne nalaze pod stalnim nadzorom redara ili policije (član 17. stav 5.),
5. ako nije prije održavanja sportskog takmičenja provedeno pretraživanje sportskog objekta ili dijela sportskog objekta u kojem se organizuje sportsko takmičenje i na kojem se smještaju gledaoci (član 19. stav 1.),
6. ako održava sportsko takmičenje bez uspostavljenog sistema informisanja gledalaca (član 20. stav 1.),
7. ako unutar sportskog objekta omogući ili toleriše prodaju i distribuciju alkohola (član 21.),
8. ako sportsko takmičenje održava noću, a sportski objekat nije opremljen samostalnim izvorom električne energije (član 22.),
9. ako kod otvaranja sportskog objekta zanemari opasnost od nastanka gužvi i nereda i ne preduzima mjere koje mogu smanjiti ovakvu opasnost (član 23.).

Za prekršaj iz stava 1. ovog člana novčanom kaznom od 500 do 1000 KM kaznit će se odgovorno lice organizatora sportskog takmičenja.

#### Član 39.

Novčanom kaznom od 500 do 700 KM ili kaznom zatvora u trajanju do 60 dana kaznit će se za prekršaj fizičko lice koje:

1. posjeduje ili konzumira alkoholna pića ili opojne droge ili posjeduje pirotehnička sredstva, oružje i druga sredstva pogodna za nanošenje ozljeda ili za stvaranje nereda i nasilja prilikom dolaska i/ili prilikom odlaska sa sportskog takmičenja (član 4. stav 1. alineja 1.),
2. pokuša unijeti ili unese u sportski objekat alkoholna pića, opojnu drogu, pirotehnička sredstva, oružje ili druga sredstva pogodna za nanošenje ozljeda ili za stvaranje nereda i nasilja (član 4. stav 1. alineja 2.),
3. pokuša unijeti ili unese i ističe u sportskom objektu transparent ili drugu stvar s obilježjem koje iskazuje ili potiče mržnju ili nasilje. (član 4. stav 1. alineja 3.),

4. baca predmete u takmičarski prostor ili prostor za gledaoce sportskog objekta (član 4. stav 1. alineja 4.),
5. za vrijeme sportskog takmičenja pjeva pjesme ili dobacuje takmičarima ili drugim gledaocima poruke, čiji sadržaj iskazuje ili potiče mržnju (član 4. stav 1. alineja 5.),
6. za vrijeme sportskog takmičenja pali i baca pirotehnička sredstva (član 4. stav 1. alineja 6.),
7. za vrijeme sportskog takmičenja pali navijačke rekvizite ili druge predmete (član 4. stav 1. alineja 7.),
8. poziva i potiče na tučnjavu ili na napad na druge gledaoce, redare, službena lica organizatora takmičenja, sportiste i druge učesnike u sportskom takmičenju (član 4. stav 1. alineja 8.),
9. sudjeluje u tučnjavi ili napadima na druge gledaoce, redare, službena lica organizatora takmičenja, sportaše i druge učesnike u sportskom takmičenju (član 4. stav 1. alineja 9.),
10. nedozvoljeno uđe u prostor na kojem se odvija sportsko takmičenje (član 4. stav 1. alineja 10.),
11. oštećuje ili uništava dijelove sportskog objekta, te prevozna sredstva i drugu imovinu prilikom dolaska, za vrijeme održavanja ili nakon završetka sportskog takmičenja (član 4. stav 1. alineja 11.).

## VIII - PRELAZNE I ZAVRŠNE ODREDBE

### Član 40.

Sportski klubovi u Kantonu svoje statute i druge svoje akte uskladit će sa odredbama ovog Zakona u roku od tri mjeseca od dana stupanja na snagu ovog Zakona.

Vlasnici ili korisnici sportskih objekata opremit će sportske objekte u skladu s uslovima propisanim ovim Zakonom u roku od šest mjeseci od dana njegovog stupanja na snagu. Sportski savezi iz određenih sportskih oblasti ili druga udruženja u skladu sa svojim ovlaštenjama zabranit će održavanje sportskog takmičenja na sportskom objektu koji ne ispunjava uslove propisane ovim Zakonom.

### Član 41.

Ministar obrazovanja, nauke, kulture i sporta uz prethodnu saglasnost ministra građenja, prostornog uređenja i zaštite okoline Kantona će u roku od šest mjeseci od dana stupanja na snagu ovog Zakona donijeti pravilnik kojim će propisati posebne uslove koje moraju ispunjavati sportski objekti prema odredbama ovog Zakona. Ministar unutrašnjih poslova Kantona u roku od 60 dana od dana stupanja na snagu ovog Zakona donijet će Pravilnik iz člana 11. ovog Zakona.

### Član 42.

Ovaj Zakon stupa na snagu osmog dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina  
Federacija Bosne i Hercegovine  
HERCEGOVAČKO-NERETVANSKI KANTON  
SKUPŠTINA

Broj: 02-01-XIII-012/05  
Mostar, 15. februara 2005. godine

Predsjedavajući  
Omer Čevra, s.r.

## 39

Na osnovu člana 36. i 50. Zakona o zdravstvenoj zaštiti ("Službene novine Federacije BiH" broj 29/97) Skupština Hercegovačko-neretvanskog kantona na sjednici održanoj dana 09. marta 2005. godine donijela je

## O D L U K U

### I

Visina naknade članovima Upravnog odbora Zavoda za javno zdravstvo Hercegovačko-neretvanskog kantona određuje se mjesečno u visini od 300,00 KM predsjedniku Upravnog odbora i 200,00 KM članovima. Pravo na naknadu članovima Upravnog odbora teče od dana njihovog imenovanja.

### II

Sredstva za naknade članovima Upravnog odbora obezbijedit će se iz sredstava Zavoda za javno zdravstvo Hercegovačko-neretvanskog kantona.

### III

Ova odluka stupa na snagu danom donošenja, a objavit će se u "Službenim novinama Hercegovačko-neretvanskog kantona".

Bosna i Hercegovina  
Federacija Bosne i Hercegovine  
Hercegovačko-neretvanski kanton  
S K U P Š T I N A

Broj: 02-01-XIII-027/05  
Mostar, 09. marta 2005. godine

Predsjedavajući  
Omer Čevra, s.r.